



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

**BNP-i Imran Khan
chioktsü akhanger**

**Zverev-i tang mezünghuba
US Open kokogo**



VOL. XXIII ISSUE NO. 334 (ADOK 334) DIMAPUR SANGTENNÜ (TUESDAY) RONGJUI (SEPTEMBER) 15, 2026 ₹ 5.00

ANSTA-i rongdak tesayur senden ayonger

Dimapur, September 14, 2026 (TYO): All Nagaland School Teachers' Association (ANSTA)-i August 2010 matongdang mapanung shimoker ajak Emergency Teachers' General Meeting ka alitsü metetdaksüogo.

Tawa in-service teachers atema TET requirement tebilemstü aser talisa RTE Act mapa metenzükang mapanung

shimokba tesayurtem atema iba senden ayonger ta ANSTA-i ashi. Sendenji September 18, 2026 anepdang CANSSEA Conference Hall, Kohima nung alitsü ta parnokisa ashi.

Senden nung tesayurtem ANSTA tsüngda pei pei tebilemstütem aser tebilembatem lemsateptsü aser külemi ozüingi melaba ama mapaninaka aotsü ta parnokisa ashi.

Amit Shah-i 1951 NRC base year mulunger

Imphal, September 14, 2026 (Agencies): Union Home Minister Amit Shah-i National Register of Citizens (NRC) atema base year 1951 amshitsü agizükba atema pelar ta Manipur Chief Minister Yumnam Khemchand Singh aser Rajya Sabha MP Adhikarimayum Sharda Devi nati metetdaksüogo.

September 14, 2026 nü BJP state headquarters nung osangbener den jembidang "BJP indang election manifesto nung NRC ya tongtipang shilem ka liasü aser taoba Chief Minister N. Biren Singh'er kümsük nung state Assembly-i August 2022 nung bangzüng renemogo" ta CM Khemchand-i ashi.

BJP-i kin o kin mangatettep ya olemtep ajanga angatetteptsü, lokti tsüngda putepshitsü aser state ajungalen free movement

bener arutsü tenangzükba lir. May 3, 2023 nü ozüing alema inyaksangshi tenzükba atema sasaa bilemer aser opposition teloktemi aijaka BJP-i yimjung maparen maneni inyaker ta Khemchand-isa ashi.

Opposition political party temi aitsütsüba dang bilemer saka BJP-ibo tangatettep kati arutsü atema inyaker. BJP-i aniba Centre sorkari Inner Line Permit (ILP) mapanenzükogo aser iba ya lisopurtem kümsük ayutsü nangzükba kuli lir ta paisa ashi.

Tang mepetmesü adokba atema nübortemibo tang teinyakdak sorkar nem tenüng agütsütsü saka ozü sorkari state nung kin 36 prong kümsük ayutsü nükjidong yur inyaker ta CM Khemchand-isa metetdaksü.

Mizoram sorkari family pension amnesty scheme atema arogo dang teyari meshir

Aizawl, September 14, 2026 (Agencies): Mizoram nung tim masübaleni mesüra kulikaket meshitak bener family pensions agizüka agirtem atema sorkari ita asem amnesty scheme ka tenzükogo aser iba nung arogotem teyari meshiogo.

Mizoram sorkari September 30 tashi nung family pensions mangutsüpurtemi pei sasa Pension Payment Orders (PPOs) agütsütsü tayongzükba agüja lir.

Iba atema Mizoram sorkari taoba hopta state nung arogotem dangi shidi ka zülüogo aser iba nung pei pei arogopurtem dang Finance Department ajanga June 16 Office Memorandum sangdongba zünga metetdaksütsü temepishiba agütsü.

Tim masüba beneficiary temi iba osang metettsü aser parnok pensions meyipa agütsütsü maongka agütsü atema iba mapanenzüker ta sorkari ashi.

State sorkari July 1 nungi September 30 tashi iba surrender window lapokja lir aser iba mapang ineligible family pension beneficiaries-i pension agizüka agiba meyipa magütsüi PPOs agütsütsü maongka agütsür.

"Asenok ya Khristan state ka lir aser arogo züngsemtem sorkari

ozüing aser inyakyimtem sülen anidaksüla, anungji onoki iba khuret nung arogotemi amalitepa yariteptsü mepishir" ta sorkari züluba shidi nung shia lir.

Tim masüba beneficiary temi parnok pension agizükba Treasury Office-i aotsü aser PPOs meyipa agütsütsü metetdaksüogo.

Züngzüksüba anogo süiba sülen sorkari task force ka tentettsü aser parnok family pension beneficiaries jangjatsü.

Taila mesüra tim masüba kulikakettem amshia family pensions agizükertem anentsütsü aser Bharatiya Nyaya Sanhita (BNS) mesüra Bharatiya Nagarik Suraksha Sanhita (BNSS) kübok temerenshi alitsü ta sorkari metetdaksüogo.

Maneni, taila kulikaket agütsürtem dak ozüing tapet agi merenshitsü ta parnokisa ashi.

Chief Minister Lalduhoma-i taküm July ita voluntary surrender of PPOs indang sentong tenzüksüdang sorkari public senotsü tim mesü amshiba noktangtsü aser chichiba pensioners-i pei tangutsü tim angutsü ta shia liasü.

Mizoram sorkar kübok nisung 39,954-i pension agizüker aser parnok rongnung family pension beneficiaries 11,194 dena lir.

Naga People's Front-i Dr. SC Jamir o meyiptsür

Kohima, September 14, 2026 (TYO): Taoba Chief Minister Dr. S.C. Jamir-i Nagaland nung President's Rule benoktsü jembiba aitsür ta Naga People's Front (NPF)-i metetdaksüogo.

Nagaland nung nübortemi shimtetba sorkar ka lir aser ibaji agientsü ken o kecha mali ta NSF-i ashi.

Dr. SC Jamir-i September 12 nü Dimapur nung osangbener den jembiba olen atema NPF-i iba o meyiptsüogo. September 10 nü Dr. Jamir-i New Delhi nung RSS tanishir Mohan Bhagwat den ajurutepta sülen Dimapur nung osangbenertem den ajurutepta jembiba.

Nagaland nung sorkar ketdangsübaren mali kümogo. Naga political groups 36-37 tashi kümogo, tax onsara sarur aser yimjung maparen kanga atsülanger ta Dr. Jamir-i ashi.

Paisa President's Rule benoktsü aser Centre dang 2026 küm tatemlen tashi nung final settlement ka agütsü ayongzük. Framework Agreement aser Agreed Position nung amendaker tatembang lemtet agütsüla ta Dr. Jamir-isa ashi.

Ajisüaka, NPF-i iba

asadangba magizüker aser sorkar shitak dang ketdangsüa odar aser terenlok mapaneni inyakdar ta ashir.

State sorkari Centre den Naga yimten latettsü atema maneni jembiba arudar ta NPF-isa metetdaksüogo.

Taoba mapang President's Rule benokba ajanga teti atema tensa süngjema maküm aser Naga yimjung maparen tejakleni bener mao ta parnokisa ashi.

Chief Minister Neiphiu Rio-i Naga telok kar dang pusema nungiter ta asüba magizüker. NPF-i telok ajak adenba aser ajaki akhümtsübuba lemtet ka agütsü atema noktaker ta parnokisa shisem.

NPF-i Naga loktiliba nung telok ajak den "equi-closeness" policy nung ajemdaker inyaker saka Dr. Jamir kümsük mapang "equi-distance" liasü. Maneni, Naga nung longjema alitsü nüngdakba mapanung "Sabotage Club" mesüra "Status Quo Club" amala o ajanga telemsa tuluba kümdaksütsü ta NPF-i o meyiptsü.

Külen, Concerned Naga Forum of Nagaland-i Political Affairs Committee (PAC) aitsüba

magizüker ta NPF-isa ashi.

Yimjung olemtep nung maparen inyaka aruba tejakleni bener aotsü atema PAC tentet. PAC ya tetenzük nungi olemtepshitsü atema tentetba masü ta parnokisa ashi.

Taoba interlocutor R.N. Ravi-i mapanungi anenba sülen yimjung maparen tashimait aküm. Pai mapanungi anenba sülen bureaucratic adviser ka jenjang nung dang olemtepa aru saka civil society groups, tribal hohos, shisashirtem aser MLA tem den asüngdangtepba sülen PAC-i political mesüra ministerial level nung olemteptsü asüngdangogo ta NPF-isa metetdaksü.

CM Rio-i ministerial committee ka tentettsü shidangba sülen taküm küm tetenzüklen Union Home Minister Amit Shah den senden ka menogo. Iba teshimtet telok nung Chief Minister, PAC sub-committee members aser Nagaland MP anaprong.

Centre-i politically empowered interlocutor ka shima Naga olemtep tembangtsü ayongzüker ta NPF-i metetdaksüogo.

RPF-i Tamil Nadu arem nung Naga nung lanur ana kümsük

Dimapur, September 14, 2026 (TYO): Railway Protection Force (RPF)-i Deobarnü Tamil Nadu nung arem ka nungi Nagaland nungi lanur ana kümsükogo.

Lanur ana yagi kinunger dang meshii ki toktsür Kerala nung mapaninaksü atema apusoa aoba liasü. Tena ya Katpadi anasa Ammor yimtsüng nung railway track ka anasa arem nung lia angu.

Tena amenba train ji Andhra Pradesh kübok Samalkot Railway Station nung anenzükang tena kimai alu aser

idangji tenati train memenep odaksü. Iba sülen tenati Gurudev Express nung Thiruvananthapuram-i aotsü atema ticket tasen alia amen.

Ajisüaka, train nung aodang tena indang khu sama aser Katpadi anasa train nungi kimai alu aser train lenmang anasa aremleni ao. Tena indang mobile phones nung battery temadok aser tena rongnung kati mobile khen atema charge sür par kinunger dang tena samaba osang sangoktsü.

Idangji kinungertemi

Nagaland Police nem osang sangoktsü aser parnokisa Katpadi RPF dang train details osang yoka liasü.

September 12 aser 13 tsüngda aonung tzunglu kanga aruaka ASI P.R. Murali aser Head Constable G. Gopalakrishnan nati anir RPF patrol team kati search operation tenzük aodang Deobarnü arem nung tanur ana angu.

RPF-i iba osang Child Welfare Committee nem sangoktsü aser tanur ana Child Helpline ket nung agütsüogo.

Tollen nung tepsetba apuani tanurtemi lungkak aitdak shilem agi

Imphal, September 14, 2026 (Agencies): Manipur kübok Tollen yimtsüng nung Deobarnep Kuki-Zo apuani ka khasetba tanur anati September 14 nü lungkak aitba sentong ka nung shilem agiogo.

Tanü Tamenglong aser Noney nungi Kuki-Zo tetsürtemi tasürtem atema temeten meshia lungkak aitdang tanur anatia shilem agia liasü.

Tollen aser Longpi yimtsüngtem nung Kuki-Zo civilian pezü khaset aser tanur ka dena aika yirutsü aser tanü tetsürtemi parnok asoshi temeten meshia lungkak ait.

Idangji Seineh Singit aser pa kinungtsü Lhingiangai Singit na

tanur anati shilem agi. September 13 nü Kuki-Zo nungeri 'Sahnit Ni' (Black Day) amungba anogo nung apuani nay a Tollen yimtsüng nung khaset.

Tena ya kidang mejanga lia anepongi amak. Idangji Lhingiangai ki telungnung khaset aser Seineh yirur kidang nungi jena ao saka pa mozü kidang asü.

Iba tatalokba nung tena jabaso tanubosang Henminsang Singit yirua lir.

Kuki-Zo nungeri nisung tepsetertem putettsü aser parnok amakba bushisüngdang asütsü takhangba agütsüba mapang ka asür apuani na tanurtemia shilem agiogo.

Iba tatalokba sülen police aser

central forces joint inquiry team kati asür ki tonga oa osangtsüsang metetpelaogo.

Kuki Inpi Jiribam, Tamenglong aser Noney ajanga sorkar dang ghonda 24 tsüngda mapaninaksü mapang züngzüksüogo aser ghonda 24 rongsenketzung mokdangba metetdaksüogo.

Parnokisa iba ken o National Investigation Agency (NIA) nem agütsütsü aser Tollen nung teti atema security forces mapanienzüksütsü takhangba agütsüogo.

Hombarnü Kangpokpi district headquarters nung dokan aser shishilembadak ajak shibanga liasü.

Niuland nung administrative officers atema ki semzüko



Niuland nung administrative officers atema ki semzüko sentong nung tangokba noksa angur. (Niuland, Sept 14, 2026)

Dimapur, Rongjui/Sept. 14 (TYO): Minister, PHED & Co-Operation, Jacob Zhimomi-i September 14, 2026 nü Advisor, CAWD, Kudecho Khamo aser district ketdangsürtem lia Niuland nung mapa inyakba administrative officers atema flat type quarter (Type-C) ka semzüksüo.

Minister Zhimomi-i iba sentong nung jembidang, state sorkari districts ajunga nem kasa teyari agütsü meranger ta ashi aser Niuland nung aliba nüburtem dang district tanem-tanemi renloka aoba atema aremzüka alitsü ayongzüka liasü.

Zhimomi-i Detailed Project Report (DPR) nung aliba ama mapang shidak nung iba mapa tema inyakogo, aser iba sülen tebour ajungtsü mapa kar inyaksü, ta ashi.

Pai tribal lokti, civil societies aser telungpur telok jateta adokba tebilemstü lemsatop aser Naga nungertem lungjema alitsü ayongzüka.

Iba project mapang shidak

nung tembangba atema Advisor CAWD, Keudecho Khamo aser ketdangsürtem dang Zhimomi-i pelaba lemsatop.

Advisor CAWD, Kudecho Khamo-ia iba sentong nung o tatsüka jembidang, Niuland nung aliba nüburtem jangraba ama Minister Zhimomi-i maparen balala inyakba atema tenüngsang agüja liasü.

State nung General Administration buildings 1,400 dak tema lir aser yangji Deputy Commissioners, Additional Deputy Commissioners, Sub-Divisional Officers aser Extra Assistant Commissioners indang offices den sorkar indang guest house tem dena lir, ta Khamo-i ashi.

Pai iba project mapang shidak nung renemba atema Minister Zhimomi aser contractor Isaac Zhimo nem tenüngsang agütsü.

Advisor Khamo-ia telungjem ya tongtipang lir ta ashi aser telungjem melira terenlok malitsü ta shia nüburtem dang sorkar meyong

ki o jen pei indang ama kumzüka ayutsü ayongzüka liasü.

Deputy Commissioner, Niuland, T L Kiusumong Tikhir-i pela agizükba o jembidang Minister Jacob Zhimomi dang pelaba lemsatop aser iba ya mapang talangka nungi yongya ataba project ka lir aser iba project renemba ya administrative officers anisüngzüka kisung masü saka nüburtem nem service tajungba agütsü, ta ashi.

Iba sentong nung Er. Omegali, EAC Niuland menden liasü aser Assistant Engineer CAWD, Daniel H Lotha-i iba ki yangluba technical report agüja liasü. Pai ashiba agi, iba ki yangluba ya 2023 kum tenzüka aser 2026 nung renem. Iba ki ya RCC structure aser mezüng floor slab yoka lir aser kilem ya Dyna roofing inoka lir.

Ki ya 1,417 square feet per unit lir aser site development, water supply, metzü meshiba tesemtem, tzünglu tzü bendenba aser electrification dena lir.

Dimapur nung pensioner verification tenzüksü

Dimapur, Rongjui/Sept. 14 (TYO): Office of the Senior Treasury Officer, Dimapur ajanga Dimapur Treasury Office nungi pension agizükur ajunga dang 2026 kum atema Annual Physical Verification ya September 21 nungi November 3, 2026 tashi alitsü ta metetdaksüo.

Pension Payment Order (PPO) numbers nung ajemdaker pensioner tem verification atema anogo lemsaja lir.

Verification ya September 21 nü tenzüksü aser iba mapang family pensioner tem PPO number F1-500 aser life pensioner tem L1-1500 nungi tenzüka agitsü. Iba ya maneni October 13 tashi nung batch lemsar agitsü, kong family pensioner tem F5001 aser tema aser life pensioner tem L6001-6500 tashi ayimjema alitsü.

October 14 nungi October 27 tashi PPO ranges balala nung life pensioners atema anogo balaka agütsür aser iba mapang absentees aser pensioner temang majung alirtem verify sütettsü. Final period ya October 28 nungi November 3 tashi alitsü aser iba mapang absentees, temang mejungi aliba pensioner, arishi kum 75 nungi tema old-age pensioners aser tanga cases tem verify asütsü, ta ashi.

Iba physical verification atema aruba pensioner temi Gazetted Officer kati countersigned sür aliba Life Certificate, PPO Book, Aadhaar Card photocopy, tang tamshidak bank passbook front page photocopy, ita trok tsüngta agiba Passport-size photograph tem bener arutsüla.

Life Certificate Form ya Treasury Office nungi office mapang arua meshitsü akok mesüra Department of Treasuries and Accounts website nungia download asütsü akok.

April 1, 2026 sülen mezüng pension payments renema lir, item pensioner tem physical verification atema arutsü menügdaker, ta ashi.

Pensioner tem dang Digital Life Certificates (DLC) yanglutsü atema Jeevan Pramaan portal amshitsü ayongzüker. Shirnok Jeevan Pramaan portal amshia register sür Digital Life Certificate yanglua aser TreasuryNet application nung inoktsüo, parnok physical verification nung madentsü.

Pensioner temi annual verification process inyakyim tiptema inyaksü asoshi mapang lateta aliba ama nüngdakba kuli kaketter bener arua agütsü ayongzüker, ta Treasury Office ajanga nenshia ashi.



Noklak-Panso lenmang nung aliba Lein apu khen atema September 14, 2026 nü yanglushiba mapang tangokba noksa nung angur.

KROS College nung Legal Service Clinic ka ayongzüka



KROS College, Kohima nung Legal Service Clinic alidang tangokba noksa ka nung Member Secretary, NSLSA, Neiko Akami, NJS den tesayur aser kaketshirtem angur.

Dimapur, Rongjui/Sept. 14 (TYO): Member Secretary, Nagaland State Legal Services Authority (NSLSA), Neiko Akami, NJS ajanga September 11, 2026 nü KROS College, Lerie, Kohima nung Legal Services Clinic (LSC) ka lapokja liasü.

Iba clinic lapoktsür kaketshirtem den jembidang, Akmai-i temesepba ozü achi-ajemba nungi pila alitsü tekumdangtsü ashi aser temesepba mozü tilaka dang bena aliba mesüra shibelenba nunga timtem tulu ajurutsü, ta ashi.

Temesepba mozü amshiba, shibelenba, ayokba densema

narcotic drugs dak sendakba aibelen tem nung temerenshi tulu lir. Tepuokdak ayuba aser senchi achiba kisung masü, temesepba mozü dak sendakba aibelenba ajanga tarutsü nunga pei takum nung timtem alitsü, ta pai ashi.

Akmai-i kaketshirtem dang tanur anema mapa tamajung inyakba aser talisa Protection of Children from Sexual Offences (POCSO) Act dak sendakba ozüng tem meteta alitsü ayongzüka liasü.

Asen Walling, Panel Lawyer, Kohima DLSA ajanga iba sentong nung NALSA (Child-Friendly Legal Services for Children) Scheme, 2024 onük

nung ajemdaker jembia liasü.

Iba scheme ya tanur nem okatsür agütsüba kisung masü saka tanur asoshi child-friendly legal support system yanglutsür, ta ashi. Tanur den yaritepba okatsür tem ya training balaka agia lir, aser parnoki tanur timtem angateter aser iba scheme atema District Legal Services Authority (DLSA) ya 'point of contact' mezüng lir, ta ashi.

Sentong nung Asen Longkumer, Panel Lawyer, Kohima DLSA menden liasü aser Dr Vehutalu Vero, Assistant professor, Dept. of History, IQAC co-ordinator, KROS College ajanga pela agizükba o jembia.

Kohima nung AIM 2.0 Frontier Region Programme indang workshop ayongzüksü

Dimapur, Rongjui/Sept. 14 (TYO): Department of School Education, Government of Nagaland aser Atal Innovation Mission, NITI Aayog ajanga AIM 2.0 Frontier Region Programme indang State-Level Consultative Workshop ka September 16, 2026 nü De Oriental, Kohima nung ayongzüksü.

Iba sentong nung Lend A Hand India-i programme implementation partner ama yariteptsü. Frontier Region Programme nükjidong ya linük nung arütsü, meta talang aser aspirational regions nung innovation aser entrepreneurship tashi itshitsü atema lir. Linük nung iba sentong yagi Atal Tinkering Labs tasen 2,500 amenoktsü nükjidong lir.

Nagaland atema iba sentong kübok Atal Tinkering Labs 93 aser Atal Incubation Centres ana amenoktsü asüngdanga lir.

Nagaland ya tangbo shisa agitepba jenjang ka nung lir. Iba workshop yagi State indang geography, schools aser maongka den apat shisa bendener programme guidelines, applications aser tarutsü nung

inyaktsü atema telemtetba agitsü.

Iba senden nung sorkar departments, schools, higher education aser technical institutions, industry, start-ups aser civil-society organizations nungi teshimtet nüburtem ka kuma lungjemtsü.

Olemtem mapang ATLs tasen atema ki o jen aser access models tapet renemtsü, state den apat innovation, tesayurtem renemba aser maneni yariba, aser mentors aser partner institutions tesendaktep tuluba yangreba nung rangloksü.

Tang aliba ATL schools temi parnoki ajangshiba lemsateptsü aser ATLs maliba schools temia tebilemba tem lemsateptsü. Iba tesem nung kaketshir temi inyaktetba sayuba ajanga Nagaland nung aliba school tem nung mapa asangsang tenzüka inyaka aliba tajangzüka angutsü.

Iba shisa agitepba ajanga State nung tongtipang mapatem, timtem aser partnership atema maongka jangjatsü imlar.

Iba workshop nung Nagaland sorkar nungi ketdangsürtem, Atal Innovation Mission aser NITI Aayog nungi teshimtet nisungtemi jembitsü.

India-i anogo shia Nepal nem electricity 654 MW agütsütsü



New Delhi, Rongjui/September 14 (Agencies): India-i taküm December 31 anogo tashi anogo shia ghonda 18 Nepal nem electricity 654 MW agütsütsü.

Tawa Nepal nung ajungben tzümetsüng lendong ajanga hydropower infrastructure aika raksatsüba agi tang Himalayan linük nung nüngdakba ama electricity peria madokdaksüteter, ta Hombarnü Ministry of Power-i metetdaksü.

September 13 anogo nungi tenzüka India-i anogo shia ayaterm (12:00 ako) mapang nungi nikongdang 6:00 ako tashi Nepal Electricity Authority nem electricity agütsütsü, ta Power Ministry-isa metetdaksü.

Nepal nem Muzaffarpur-Dhalkebar 400 kV double-circuit line ajanga 600 MW agütsütsü aser Tanakpur-Mahendranagar 132 kV single-

circuit line ajanga 54 MW agütsütsü, ta Power Ministry-isa metetdaksü.

"Tawa Nepal nung tzümetsüng lendong ajanga hydropower infrastructure aika kanga mejungi raksatsüogo, aser ibaji ajanga par linük nung parnok peritsüsa power peria madokdaksüteter, ibayongji parnoki electricity tali nüngdaker," ta Ministry of Power-i sangdong ka ajanga metetdaksü.

"Nepal nem power agütsütsü atema agizükba ajanga tang ama mapang ka nung parnoki nüngdakba teyari angutsü, aser mapang talangka nungi India aser Nepal na tsüngda energy sector nung amalitep ano tajungba akümtsü," ta kasa sangdong nung shia lir.

Nepal nem taküm December 31 tashi electricity agütsütsü aser maneni sangküm January nungi electricity kwi

agütsütsüar December ita nung asadangtsü, ta parnokisa metetdaksü.


August 26 nü Nepal-Tibet arrtsülen tenemlen nungi rürjep tulu anenzüka aluba ajanga ayong nung ajungben tzümetsüng lendong tulu atalok. Tang tashi nung iba lendong nung nisung 1,385 asüba jangjaogo aser 5,130 samar mangur. Iba tzümetsüng lendong nung hydropower plants 12 tzü agi ponger oadok aser kar raksa.

Iba lendong nung samartem rongnung power station nung inyakterm 900 densema lir.

India-i Nepal nem tang tashi nung teyari oset touzük ton 130 dak tali agütsüogo, ta Ministry of External Affairs-i metetdaksü.

Item teyari osettem rongnung süki, blankets, merükmejuba osettem, solar milen aser mozü densema liasü.

Maharashtra state sorkari UCC Bill benoktsü: CM Fadnavis



New Delhi, September 14 (Agencies): Maharashtra sorkari Nagpur nung asükwa mongpu assembly senden aliba mapang nung Uniform Civil Code (UCC) Bill benoktsü, ta Hombarnü Chief Minister, Devendra Fadnavis-i metetdaksü.

atema shimba committee-i report agütsüba sülen sorkari iba bill ya benoktsü, ta metetdaksü.

Hombarnü Fadnavis-i, retired Supreme Court judge Justice Ranjana Desai-i aniba committee-i UCC ya jungjunga shisadanga renemdar, ta metetdaksü.

jembidang pai, "Uniform Civil Code renemtsü atema Maharashtra sorkari committee ka tenteta lir. Committee-i iba atemaji inyakdar. Kodang committee-i report ji agütsüdir onoki tekeraba nung iba ozüng benoktsü," ta metetdaksü.

UCC renemtsü atema taküm July ita nung committee ji tenteta liasü. Iba committee nung züngsemtemji taoba mapang high court nung judge ana- R C Chavan aser S G Mehare na, taoba mapang chief secretary D K Jain, taoba mapang advocate general Virendra Saraf, linük temzüng tsütsü mongin Ramesh Patange aser shisashir Suvarna Rawal nunger lir.

Anogo ka tejaklen Union home minister Amit Shah-i, 2029 küm matongdangsa BJP-i aniba NDA sorkar aliba state 21 prongla nung UCC benoktsü, ta metetdakja liasü.

Uttarakhand, Gujarat aser Assam nungbo UCC agizükogo.

TMC toktsür NCPI nung adener MP 17-i BJP nung adentsü

New Delhi, September 14 (Agencies): TMC nungi Lok Sabha MP 20-i Nationalist Citizens' Party of India (NCPI) nung aden, aser maneni MP 20 nungjagi 17-i taruba ita BJP nung adentsü, ta Hombarnü Cooch Behar MP, Jagadish Chandra Barma Basunia-i metetdaksü.

Taküm West Bengal assembly election nung TMC-i tamakok anguba sülen Lok Sabha nung TMC MP 20 jagi NCPI nung dena liasü.

NCPI MP tem rongnung ka, Basunia-isa, MP 17-i Durga Puja mapang nung mesüra iba sülen BJP nung adentsü, ta metetdaksü.

Ajisüaka tanüngba MP asem- Taher Khan, Yusuf Pathan aser Khalilur Rahman nungeribo indangindanga BJP nung adentsü memelunger, ta paisa metetdaksü.

Basunia-i, MP asem jagi BJP nung madenyonga par asemprong maneni National Democratic Alliance (NDA) shilem ka asütsü, ta metetdaksü.

"BJP nung indangindanga madenyonga Murshidabad district nungi MP asemji maneni National Democratic Alliance

shilem ka asütsü. Tanüngba onok 17 bo taruba ita Durga Puja matongdang BJP nung adentsü," ta Basunia-i metetdaksü.

Paisa, Muslim nunger MP asem jagi indangindanga BJP nung adentsü makoker mesüra timtem ajangshir, kechiyong par asemprongla ya Muslim nunger nütsüng tiemba aliba constituencies nungi lir, ta ashi.

Taküm West Bengal Assembly elections nung Trinamool Congress-i tamakok mejungi ngua liasü. 2024 küm Lok Sabha elections nung Trinamool Congress-i West Bengal nung Lok Sabha menden 42 nungi menden 28 tashi nung takok ngua liasü.

Taküm assembly election agiba sülen Trinamool Congress MP 20-ibo NCPI nung adenba ajanga NDA teloktep shilem ka aküm.

Parnoki Lok Sabha Speaker Om Birla ajurua NCPI züngsemtem ama agizükang ta mepishiogo, ajisüaka tang tashi nungbo magizük.

Lok Sabha records nungbo tang tashi MP 20 ji Trinamool Congress züngsemtem ama züngshir.

CPI(M) nung lenir tain, Baby John alima nungi pilaogo



New Delhi, September 14 (Agencies): Communist Party of India (Marxist) nung lenir tain, Baby John alima nungi pilaogo; pa arrshi küm 74 liasü.

Pa ya CPI(M) State secretariat nung züngsem liasü. Tamalen pa CPI(M) Thrissur district secretary liasü aser Centre of Indian Trade Unions nunga district secretary liasü.

Pa 1952 küm Manalur kübok Thaikkad nung aso. 1969 küm pai Left movement nung aden aser küm ana dang lirbo CPI(M) nung aden.

Pa mezüng party Paluvai branch nung secretary inyak; tesülen Thaikkad aser Chavakkad na nung committee nung tongti liasü.

2006 küm July ita nung pa Thrissur district secretary shima liasü aser Kerala trade union movement nung menden balala nung inyak.

Pa Fishermen's Union, Chavakkad regional Toddy Workers' Union aser Thrissur District Headload & General Workers' Union nunga inyakogo.

Linük Emergency mapang nung pa anaben pua liasü aser küm ana ser tesadang jail nung puoka liasü. 1975 küm Independence Day anogomong nung pai wako tanak ka asongtsü merangdang police-i pa dak mejungi züka liasü.

Pa mezüng 1971 küm PVM Lower Primary School (Blangad) nung tesayur inyaka liasü saka yimtenren nung toklang tenzüksü atema 1991 küm pai sorkar mapa nungi anenadok.

Chavakkad municipality tenzüka sülen 1980 nungi 1985 küm tashi pa councillor liasü aser mezügbuba standing committee chairman ji pa liasü.



TIR YIMYIM YIMOBILE (EDITORIAL)

DIMAPUR TUESDAY, SEPTEMBER (RONGJUI) 15, 2026

Yi kanga jemner !

Nagaland nung government-i yi meyanglutsü aser mayoktsü ozüing lateta lir, ajisüaka tang Tuensang nung yi tamajung jemshiba ajanga nisung tuku-ter asüba osangji taoksatsüka, shisabolutsüka aser tebilemdangtsü mapa tuluka kümogo. Iba yi tamajungji Tuensang nungji yanglur asü (?) mesüra tangalen nungi bener aru asü nungbo, kodaser yi tamajungji Tuensang tashiji bener otet ? Item telangzüba bushidangji Nagaland nung government tamakok tali jangjar. Atangji, mapa aika nung telemtetba agitsübo temela saka mapa kuma inyaksübaji tasak akümer. Iba amaji Nagaland nung telemtetba aika mapa kuma meinyaktetba angur. Atangji, Nagaland nung yi meyangluba aser meyokdaktsüba ajanga lanurtem takumbo aika kumzükdagi, kechiyong parnoki tema nung yi tejemnütsüka yoka mangur, anungji aikati yi mangu aser memetet. Ibaji dang masü saka asenok taintemi maremtet yi bushir dang ashi, tang aso tasenba 21st century nung asortem yagibo yi yoka anguyonga mejemner, anungji tebushia mebushir aser tajema majemer. Aji oda, asenok yi meyanglutsü aser mayoktsü ozüing zünga akadak lima nung yi ajemtsü jangrateper dang ashi, tanga limatem nung yi yanglutsü aser ayoktsü melaa alidakbo tanü asüing lanurtemi yi majemba agi yi yanglur aser ayokertem takoksa ngudagi. Atangji, asenok tia majung Nagaland nung ozüing anema yi yangluner aser Naga nungertemi yi onsara jemner, anungji yi ya odang ayok tajungba asütsü asü (?) ta aiben asenok rongnung tebilemba jembitepba angashir. Aji oda, Nagaland tesem kar nungbo chi agi yangluba yi dang masü saka mojitsü agi yangluba 'rum' dena yangluba osang asenoki angashiogo. Iba ama ozüing raksaba mapa ajanga nisung karbo takar kuma alitsü, ajisüaka tangar kar takar akümbaji masü saka Nagaland nung yi mayoktsü ozüing zünga akadak, yi ayokba agi takar akümtsüsa inyaktetba Naga nungjerji tesüingmangtsüka lir. Item jagibo yi meyanglutsü aser mayoktsü ozüing latettsüba yimten dang masü saka Tsüngrem dena metsübur. Atangji, yi meyanglutsü aser mayoktsü ozüing lateta alibaji mapa kuma inyaksübaji Excise department mapa lir. Ajisüaka, Excise department purtemiang yi teyanglunüba aser teyoknüba ta bilemra, kodaser parnoki yi nokdangtsü ? Iba jagi tanü Nagaland nung yi meyanglutsü aser mayoktsü ozüing lateta liaka takok mangur. Atangji, Nagaland nung yi meyangludaktsütsü aser mayoktsü asoshi Naga Baptist arogotemi kanga sashia nokdak, iba takangbaji metizüktet, state government-i yi yanglunüseta aser yoknüseta arogoi anung marem Nagaland nung yi meyanglutsü aser mayoktsü ozüing latet. Iba jagi government-ia yi meyanglutsü aser mayoktsü ozüing lateta aliba ya takok angutsü memeranger südi. Ibayongji, aiben tang amaji yi ajemba ajanga lendong atalokdang aser Nagaland nung yi mayoktsüba ozüing mapa kuma mamshitetba tamakok anguba ya arogotem dang atonger. Ajisüaka, government-i latetba ozüing ka mapa kuma inyaksübaji arogo mapa masü , anungji Nagaland nung yi meyanglutsü aser mayoktsü ozüing latetbaji arogotem takok saka iba ozüing mapa kuma mamshitetbaji government tamakok asütsü. Atangji, Nagaland nungbo government nung alirtem ajunga arogo nungjer lir, anungji arogoi ashi angaa yimteni latetba ozüingji yimten yimsüsürtemi anir Excise department nung inyaker tllaba tashi agi takok angutsüsa kanga temulung agüja inyaksüla, Joko, tangbo yi ayokba aser ajemba indang masü saka shibai Nagaland nung mim aliba yi ayok (?) ta asübajiang tama temulung agüja bushitsü tongtibang kümogo. Iba ama lendong atalokba yagi asenok tan ser Nagaland nung asenok yi jemnertemi majem arem nung jungla.

OLEMSABANG

NAGALAND TOTAL PROHIBITION ACT (NLTP) 1989

~ Bendang Imsong, Social Activist, Mokokchung .



Prohibition movement ya Arogo, NAGALAND TOTAL PROHIBITION ACT (NLTP) 1989.

Prohibition movement ya Arogo, lanur aser tetsür lenirtem yakpang sür 1974 nungi apusoa liasü. Mon district 1988 aser Mokokchung district 4th. January 1989 dry district sangdong. Anogo 7 tsüngda nung(January 10 tashi nung) Mokokchung district nungi temesepba chiyungtsütem agientsü ozüing agütsü.

Tatalokba tongtibang: YI TONGPANG TAKOK NGUTETBA BENJONG ANOGO 11th Jan 1989 ABAM mitkar lanurtemi anir football ground tezülen yi bottletem tepsa aser asür Rev.A.Riküm Ex. Executive Secretary ABAM ajanga atakatema mi tsüklokja sarasadem.

29th March 1989 Nagaland legislative Assembly nung Bill passed asü, aser June 1989 nung Nagaland government ajanga dry state declare asü.

Saka tanü asen nübur aikati iba atakatema temesepba chiyungtsütem achiajemba agi nisungtem arishi tatem metongjungi taküm tembangdagi. Anungji ABAM aser Arogotemi Social concerned Luden ajanga tang dang nungi tali temolung agüja TONGTI shilem agitsü mapang tongja tongogo.

Lai Oi yamai ashir, Yer 11:3. Tsüngremi yamai ashir, tezüngzüktepba raksaba atakatema süang. yakpang sür 1974 nungi apusoa liasü. Mon district 1988 aser Mokokchung district 4th. January 1989 dry district sangdong. Anogo 7 tsüngda nung(January 10 tashi nung) Mokokchung district nungi temesepba chiyungtsütem agientsü ozüing agütsü.

Tatalokba tongtibang: YI TONGPANG TAKOK NGUTETBA BENJONG ANOGO 11th Jan 1989 ABAM mitkar lanurtemi anir football ground tezülen yi bottletem tepsa aser asür Rev.A.Riküm Ex. Executive Secretary ABAM ajanga atakatema mi tsüklokja sarasadem.

29th March 1989 Nagaland legislative Assembly nung Bill passed asü, aser June 1989 nung Nagaland government ajanga dry state declare asü.

Saka tanü asen nübur aikati iba atakatema temesepba chiyungtsütem achiajemba agi nisungtem arishi tatem metongjungi taküm tembangdagi. Anungji ABAM aser Arogotemi Social concerned Luden ajanga tang dang nungi tali temolung agüja TONGTI shilem agitsü mapang tongja tongogo.

Lai Oi yamai ashir, Yer 11:3. Tsüngremi yamai ashir, tezüngzüktepba raksaba atakatema süang.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Chhattisgarh nung Khristan ka asüpila sentong agitsü memela



September 10, 2026 nü Chhattisgarh nung Dhamtari district kübok Nawagaon yimdak arrshi küm 55 Khristan, Peonbai Sahu süadokba sülen yimdklirtem senden amendang tangokba noksa nung angur.

September 14, 2026: Chhattisgarh state nung Khristan tetsür ka asüba sülen yimdaklir Hindu nungertemi asüpila sentongji Khristan yimsü dak sendakba yimya nung agitsü memela, ta osang ka ajanga metetdaksü.

September 10, 2026 nü Dhamtari district kübok Nawagaon yimdak arrshi küm 55 Khristan, Peonbai Sahu süadok. La ya kinüngbu den balar liasü aser tedi'er kidang telidak liasü.

Par kibong jagi küm 8 tejaklen Khristan yimsü agizüka liasü aser küm aika missionary mapa inyaka aruogo.

Yimdaklirtemi ashiba agi, yimdak Khristan kibong jagi yimdak sobaliba aser yimsü dak sendakba sentongtem nung shilem magir.

Peonbai Sahu tedi Umesh Sahu-i, "Onoki Khristan yimsü agizükba sülen küm 8 jungogo. Keno asüpila sentong agiba mapang nung yimdak mangatettep tulu adoka liasü. Onoki Khristan yimya nung asüpila sentong agitsü renema liasü saka yimdaklirtemi ibaji kanga ashishi," ta metetdaksü.

Yimdaklir kati, "Nawagaon yimdak nisung 1,200 shi lir aser yimdak nisung ka süadokra yimer ajaki shilem agir. Yimertemi süng bendentsüba den külemi nübo aser rongsen agüja asüpila sentong agitsü renemtsür. Ajisüaka par kibong yagibo küm aika yimdak sobaliba sentongtem aser lokti sentong kecha nunga shilem magir," ta metetdaksü.

Yimdaklirtem jagi Khristan kibong dangji, Peonbai asüpila sentongji Hindu nunger yimya nung agi nung ang asüpila sentong agitsü melatsü, ta ashi.

Ghonda aika o lemtepbasülen terongshi marem tesüsa Khristan kibong jagi Hindu nunger yimsü nung asüpila sentongji agitsü melung.

Iba sülen ang Hindu nungertemi benshiba ama tasümagji rongdoka liasü.

Iba tatalokba dak sendakba nung Dhamtari district nung pastor, Shibu Roy-i, "Iba ya

khenyongi tim masü. Asürtem danga taochi mesayur," ta metetdaksü.

Tang Chhattisgarh nung Bharatiya Janata Party sorkar lir aser iba state nung mapang shia Khristantem aser Khristan rejutem amaker.

Shibu Roy-i, "Sensakertem dang yimsü ka dang benschitsü tuyurtemi ozüng alema inyaker, ajisüaka ozüng kübok parnok nem temerenshi magütsür," ta metetdaksü.

Chhattisgarh nung meimchir temeden atema inyaker lawyer, Ramesh Kumar-i, Khristantem densema nütsüng ajema alirtem

amakertemji aiben police-i kümzüker, ta ashi.

Osangbenertem den jembidang Ramesh Kumar-i, "Chhattisgarh state nung yimjung meimba Khristantem anema inyaksü atema right-wing Hindu nationalist temi anti conversion ozüng ya tim masüba nung amshir," ta metetdaksü.

Chhattisgarh nung anti conversion ozüng tasenba Chhattisgarh Freedom of Religion Bill, 2026 ya taküm August 4 nü benoka liasü.

Nütsüng million 30 aliba Chhattisgarh nung Khristan nütsüngbo shilem 2-a majung.

tuyuogo.

Leela-i, "Iba tatalokba bushisüngdangtsü atema team ka tentetogo aser police danga iba kiojen chirepba kuli bushisüngdangtsü tuyuogo," ta metetdaksü.

Laisa Church of South India (CSI) nem show-cause notice ka agüja kimong dak sendakba documents aser Tenla ki asütsü atema tanga temelaba balala meshia aliba sayuang, ta metetdaksüogo.

"Iba tesem nung Tenla ki asütsü atema temelaba meshibaji sayuang ta onoki Arogo nem metetdaksüogo. Parnoki agütsüba kuli aser documents nung ajemdaker ketdangsertemi telemtetba agia

ANOGO ABEN TSÜNGREM DEN

Dalang agi ali

...nenok temang Pa tenla ki lir ta nenoki memetet no? Aser nenok pei meyong masü; kechiyong nenok dalang agi ali. Anungji nenok temang nung Tsüngrem sentsüwangshidakjang. 1 Korinth 6: 19-20.

Ibai taküm. Ibai Kü temang. Iba dagi ni kechi inyakner inyaksü akok. Temzüngi kü nem temeten agüja lir. Atangji, temzüngji Tsüngrem kübok meimchir temeten agütsüba lir. Saka Khristan taküm nung temzüngji dang tashi (authority) aser tematiba masü.

Ne taküm aser temangji ne kija meyong dang masü. Itemji Tsüngremer sempettem lir. Nai ibaji akhüm tsübudaktsüner aser Pa sentsüwangshi asoshi amshitsü Tsüngremi aginer. Nai ne temang junga anebalutsüla aser tamajung nungi kümzüka ayutsüla. Temang raksaa achi-ajemtsü, na sünütsü süa amshitsü atema ne nem temeten magütsü. Nüktapangtaji Tsüngrem ozüng raksaba aser iba yagi temang aser taküm raksar.

Tsüngremi asenok yanglu aser Pa meyong ta Pai akhanger. Pai asen temangji Pa alidak asütsü yanglu. Yisui Pa temang kangki nung asütsü agütsübaji asen taa agütsüba, Pai asen temanga dena Tsüngrem meyong asütsü alizük. Teti tatem makai asen Tsüngrem sentsüwangshidaktsütsü asoshi Pai asenok temaleni ajungkettsü nangzük.

Tamil Nadu nung Tenla ki chirepba lendong nung nisung asem asü



September 14, 2026: Tamil Nadu nung tang tesüdak Tenla ki ka chirepba lendong nung nisung asem asü aser nisung 12 kanga mejungi yiruogo.

September 10, 2026 nü Tamil Nadu nung Vellore district kübok Manji Krishnapuram yimdak Church of South India (CSI) indang Tenla ki ka tesüdak mapang ajungbena chirepa tsünglanglen mapa inyaker aika anenbanga liasü, ta ketdangsertemi metetdaksü.

September 11 nü Vellore district Collector Leela Alex-i iba iba tatalokba ya jungjunga bushisüngdangtsü tuyuogo; iba Tenla ki asütsü atema temelaba shidak meshia lir maliar bushisüngdangtsü atema

inyaksü," ta lai metetdaksü.

September 14 nü osangbener den jembidang CSI Bishop, Henry Sharma Nithyanandam-i, "Iba Tenla ki asütsü atema tentetba Khristan committee jagi Tenla ki asütsü tebilemba alibaji CSI Diocese of Vellore nem memetetdaksü, iba denji külemi sorkar ketdangertem dang nungia jelia temelaba memeshi," ta metetdaksü.

Paisa, küm trok tejaklen Khristantemi iba kimongji alizükba sülen süngdong atem aser Tenla ki asütsü atema mapang talangka tenla bendena aruogo, ta metetdaksü.

Nithyanandam-i, "Tenla ki asüba mapa anenogo aser iba

tesem jagi shinga moudaktsütsütsü atema district collector-i iba tesemji atsu agi longbangogo. Bushisüngdangba nung onokia yaritepdar," ta metetdaksü.

All India Catholic Union (AICU) otongdar, John Dayal-i, Tenla ki mesüra tekülem ki (Hindu nunger) mesüra mosque tasen ka chirepra ibaji contractor, structural engineer aser kiojen kiburtem khuret asütsüla, ta ashi.

Dayal-i, "India nung aliba yimtitem, jilattem, yimtsüngtem nung kiojen aika ketdangsertem dang nungi temelaba memeshii asür," ta metetdaksü.

Paisa, tawa New Delhi nunga ponguben amentepa asüba kiojen ka chirepba lendong nung tebur tenet süogo, ta metetdaksü.

District collector Alex-i, Tamil Nadu state sorkari iba lendong nung asürtem nem teyari agütsütsü, ta metetdaksü.

Iba tatalokba dak sendakba nung police-i private contractor John David anema FIR benokogo. John David-a iba lendong nung yirur Vellore nung aliba Christian Medical College Hospital nung treatment agidar.

Police-i ashiba agi, iba yimdak ita aika tejaklen CSI Tenla ki ya asü tenzüka liasü.

AO OSHI ANGAZÜKDAK:**TANÜ ANGAZÜKTSÜBA OJANG****Atinangka**

(adj) Tuluka (big one)

*Kü shilem atinangka yabo nibo mechimatsü.

Azümak

(Adj) taaktsü maket, meshimetsütsü maakba (shameless to beg)

*Nisung karbo azümak meshimetsülen dang jajar.



Tir Yimyim

OLONG PAITEP # 7650

1				2				3		4
5		6								
							7			
8										
										9
		10				11				
				12				13		
14										
						15				
16										

TIPLÉN

2. Auonungchiyongsü asenba

-(7)

5. Mangyimba mapang

-(5)

7. O tamendakdak

-(4)

8. Peidak malangba

-(7)

10. Juli

-(7)

12. Sen ayudak

-(7)

14. Tenük agi ajitet

-(4)

15. Tamajung aküm

-(5)

16. Apuso

-(7)

LANGTSÜNGLEN

1. Lenmang

-(7)

2. Aor kidong ka tenüng

-(6)

3. Tenarong maten

-(6)

4. A _ _ _ g

-(3)

6. Mopung apodoka

-(3)

ola adokdaksüba

-(3)

9. Tongtipang tagitsü

-(7)

10. Menungra bilem

-(6)

11. Aiür

-(6)

13. S _ _ _ k

-(3)

14. T _ _ _ r

-(3)

OLONG PAITEP # 7649 TELANGZÜBA**TIPLÉN :**

1. Yiar, 3. Tesola, 7. Yimra,

8. Tangar, 9. Peria, 10. Tanur,

11. Tasen, 13. Lemjem, 15. Tambu,

16. Khuret, 17. Sang.

LANGTSÜNGLEN :

1. Yimti, 2. Amen, 4. Shiner,

5. Alaka, 6. Satan, 9. Putet,

10. Tembar, 11. Tatok, 12. Amang,

14. Jala.

NAI-A YA METETTER

Romania yimtiba Bucharest nung nisung meyrjang aika adenshir "longest table made from recycled materials" indang Guinness record yangluogo.

Nisung 20,000 tashi Palace of Parliament jakdang adenshir Unirii Boulevard nungi Constitution Square tashi 5,055-metre (3.1-mile) "Uniting Table" yanglua liasü aser Guinness World Records ajanga iba otsü tasen atema kulikaket agütsüogo.

Assam YouTuber Bhukhan Pathak-i ki yanglutsü

Guwahati, September 14, 2026 (Agencies): Assamese YouTuber Bhukhan Pathak-i 2026 küm Assam tzümetsüng agi kongshiba kibongtem yaria arudar.

Pathak-i Sivasagar nung oa tzümetsüng agi ki raksatsüba sensaker kibong ana nem ki yanglutsüogo.

Iba ki anaprong nem Assamese kentener Zubeen Garg-i ajungmesoba tenüngtem jaloktsüogo.

Panbecha area kübok Gorkokh yimtsüng nung Bhukhan Pathak-i mezügbuba ki yanglutsüba nem Zubeen Aloy ta jaloktsü. Iba tenüng ya Zubeen Garg nem bendanga agüja jatsüogo aser iba tenüng ajanga iba kibong nem tesangwa, teimla aser tetenzük tasen ka agütsür.

Tanabuba kiji Betbari area kübok Sukanpukhuri yimtsüng nung yanglu aser Sonere SojuwaPoja tenüng jaloktsüogo. Iba ya Zubeen Garg-i mejemba Assamese nüngtugu ken rongnung ka lir.

2026 Assam tzümetsüng timtem tenzükdang Pathak-i Sivasagar nung food distribution aser essential supplies atema Rs 3 lakh tashi tenla agüja liasü.

Pathak-i tanaben Sivasagar tonga oa anogo terpungunü amungdang tzümetsüng agi kongshirtem den külemi mapa nung yaritepa liasü. Iba mapang par teloki ki ana yanglutsü aser nisung aika nem senotsü teyari agütsü.

Nazira nunga Pathak-i teintet rogo kibong ka nem yipden aser talemtsü dena kidang nüngdakba osettem

agüja liasü.

Pathak-i relief aser rehabilitation efforts tanabuba shilem nung Rs 2.5 lakh shi ka endoka liasü aser 2026 Assam flood relief nung pai Rs 5.5 lakh shi endokogo.

Pathak-i 2026 tzümetsüng lendong nung relief maparen inyakba dak alia pa rongsen aser public sabang amshia kibongtem aser kijatem yariogo.

Bhukhan Pathak ya Assam aser Northeast nung nisung aikati YouTube aser digital-media industry nung mezügpur ka ama züngshir.

Northeast India nungi Silver Play Button mezüng angusangji pa lir. 2017 nung pai iba sempet ngua liasü aser iba ajanga Northeast-i YouTube o social media nung shilem agiba meteta aküm.

APU-i Vande Mataram tenüng nung mini marathon ayongzük

Itanagar, September 14, 2026 (Agencies): Pasighat nung Arunachal Pradesh University (APU)-i 'Run for Vande Mataram @ 150' ta ser ita ka piyong benjung amunger aser iba nung shilem ka ama September 13 nü 5.5-km mini marathon ka ayonga agiogo.

East Siang district nung ayonga agiba marathon nung nisung 209-i shilem agi. Iba ya Department of Mass Communication ajanga ayonga agir aser October 7 nungi 9, 2026

anogo asemnü grand finale agia tembangtsü. Iba sentong nung Ministry of Culture, Government of India-ia teyari agütsür.

Arunachal Pradesh BJP president Kaling Moyong-i Deobarnep 5:45 ako nung Gandhi Chowk nungi marathon tenzükdaksü aser Arunachal Pradesh University nung tembang.

India-i nüjiso bushiba movement nung Vande Mataram-i tongti shilem agi aser iba rara nung nüjiso

bushirtem nem tetushi agütsür ta Moyong-i ashi.

Iba ken ya Bankim Chandra Chattopadhyay ajanga mejem aser tanü tashi iba ken ajanga linük yangertsü ajungmesor ta paisa ashi.

APU Registrar Narmi Darang-i o jembidang physical fitness nung temulung agütsütsü ayongzük.

APU-i maneni kaketshirtem aser faculty züngsemtem asoshi sports & wellness ajungkettsü ta laisa ashi.

North East Creator Circuit nung Hima Das nem tetushi agütsü

Guwahati, September 14, 2026 (Agencies): North East Creator Circuit tenzükbala sentong nung creators aser personalities 32 nem sempet

agütsüba nung Olympic sprinter Hima Das dena liasü.

Iba sentong ya Guwahati nung agi aser Northeast tesem balala nungi creators 125 tema

adenshia shilem agiogo.

Hima dang 'Dhing Express' ta ajar aser la nem Pride of the Northeast Award agütsü. Assam, Meghalaya, Tripura, Mizoram, Nagaland, Arunachal Pradesh aser Manipur nungi creators-i iba sentong nung shilem agi.

Creator Icons Awards - The Northeast Edition ajanga nisung 32 ajiteta tetushi agütsü. Hima Das dak alia Amrita Gogoi-i Voice & Digital Impact Award, Imphal-based Maxina Paonam-i Style Statement Award aser Preeti Kongana-i Fashion Creator of the Year narokümtem angu.

GOVERNMENT OF NAGALAND

OFFICE OF THE SUB-TREASURY OFFICER

CHANGTONGYA

NO.STC/PEN/2026-27/37

Dated CTN, the 11th Sep. 2026

METETDAKTSÜR

Pensioner shibasa **Jeevan Pramaan App** ajanga Digital Life Certificate meinyakteti lir, kum tsungta 2026-27 atema Physical Verification agitsü. Anungji agüja aliba anogotem nung Verification Form aser form nung meshia aliba documents tabensa bener Sub-Treasury Office, Changtongya-i arutsü metetdaksür.

A. Life Pensioner

Mongputeni (October) 7, 2026

Mapang : 10-AM

B. Family Pensioner

Mongputeni (October) 8, 2026

Mapang : 10 AM

Digital Life Certificate malirtem mesüra verify mesütet-i alir tenüngtem Treasury Office kima **Rongjui (September 28)** nungi tenzüka angati Verification Form den külemi angutsü.

Sd/-

TEMSUSOLA

Sub-Treasury Officer

Changtongya

OFFICE OF THE

JANGPETKONG SENSO TELONGJEM MANGKOLEMBA

P.O MANGKOLEMBA - 798604, MOKOKCHUNG ; NAGALAND.

Ref.No. JSTM/2026/09

Dated:14th Sept 2026

SANGDONGER

Civil Society Organization Mangkolemba ajanga "Multi purpose Hall Mangkolemba" ji Mangkolemba nung alitsüla tim ta koba yimyim agüja lir, iba yimyim dak sendakba nung Jangpetkong Senso Telongjem Mangkolemba-i tashi agi nungiter aser takok mangu tashi nungittsü. Aoer-i aoer Sobaliba memetet yamala tashiyim mapa inyaka Longtho yimtsüng nung "Mangkolemba" ta zülua amshia yoka achibaji khü-khüa aitsür.

Iba amala sobaliba nung maliba tashiyim mapa tarutsü nung majurutsüsa Aoer Senso ajaki aitsüsüla aser CSO Mangkolemba den JSTM-i tatem tashi nokdaksü ta sangdonger.

Sd/-

Lanutemjen

President , JSTM

Sd/-

Tiamenba

Secretary, JSTM

Yemen sorkar sepaitemi Taiz nung tesem kar meyipa agiogo

Sanaa, Rongjui/September

14 (Agencies):

Yemen nung alima kintemi agizüker aliba sorkar indang armed force temi Houthi telok ket nungi tesem kar meyipa agiogo aser southwestern Taiz province nung maneni tejakdangi odar.

Hombarnü Taiz nungi Al Jazeera Arabic osangbener Yasser Hassan-i ashiba agi, Saudi Arabia-i teyari agütsüba Yemen sorkar sepaitemi Houthi teloki parnok amakba nokdangteta Deobarnü Taiz anütoklen tesem kar atsüngaogo.

"Anüng ajanga Houthi telok adenshia aliba tesemtem amakba ajanga sepaitem nem teyari agütsü. Air force-i maneni Mocha, Dhubab aser temeket tesemtem nung Houthi telok makdar," ta Hassan-i ashi.

Kasa mapang nung Houthi telokia Hombarnü sangdong ka ajanga parnoki ballistic missile aser drone tem amshia Saudi Arabia makogo, ta ashi.

Iba telok yagi ashiba agi, parnoki Saudi Arabia nung aircraft hangar, radar installation, runway, prangbong injang bendena ayuba tesemtem aser Khamis Mushait kübok King Khalid airbase nung tanga tesemtem makogo.

Tesüiba anogo pongu tsüngda anüng ajanga Houthi telok 300 dak tema ben

amakba atema telangzüba agüja parnoki item tesemtem makogo, ta iba telok yagi ashi.

Ken o dak sendakba nung Saudi Arabia-i kecha telangzüba agüja mali.

Deobarnü Saudi civil defence agency-i, Abha yimti aser Khamis Mushait meketa aliba tesemtem kümdangshia atatsü metetdaksü, saka mapang tatsüka dang lir iba tekümdangtsü metetdaksüba aginja liasü.

Yemen nung küm 10 shi civil war rara aruba ya July ita ano tenzükshia liasü, aser iba ajanga 2022 küm United Nations teyongtsüi ia tenangzüktepba yangluba raksatsü akok ta bilemer. Houthi teloki Temerem Tzüyim nung Saudi Arabia indang rongtem mesenzütsü atema tenokdangba agütsüba den tzüyim nung rongtem amak tenzükba sülen rara tenzükshia liasü.

Iba sülen rara ya arrtsü adena prokshia ao aser Houthi teloki southern Saudi Arabia nung totzü facility balala densema tesem balala amak tenzük. Tesem balala amakba mapang nisung aika yiruogo.

Kasa mapang nung International Organization for Migration-i Deobarnü ashiba agi, Yemen nung rara tenzükshiba sülen nisung 86,000 shi pei talidak ki toktsür jenshiaogo.



Philippines south tsütsü Cotabato yimti nung September 14, 2026 nü Bangsamoro Autonomous Region in Muslim Mindanao parliamentary elections agiba mapang polling center ka kima nisung telok kati opposition telok indang gari ka raksatsüba noksa nung angur. 2019 küm iba region amenteter parliamentary elections tang mezüngbuba agir. Muslim nunger timba aliba region nungya pei sasa yimsü asütsü atema Hombarnü otsüsütsü vote ya kanga tongtipang mera ka lir.

BNP-i Imran Khan chioktsü akhanger

Islamabad, Rongjui/Sept. 14

(Agencies):

Pakistan-i Balochistan ketdangsüba asoshi Balochistan National Party (BNP)-i aija nisungtem apuba sülen miimbanga ayuba inyakyim tembangtsü, political prisoners chioktsü aser province nung ali rongsen tim yimya nung mesüi tajangzük atema amshiba mera melenshitsü akhanger.

Iba party yagia tanga opposition yimten yimsüsür lenirtem den lungjemer tepuokdak yua alir taoba Pakistan ato kilonser Imran Khan, Baloch activist Mahrang Baloch aser tanga political prisoners tem chioktsü akhanger.

BNP-i tang Balochistan nung operation agiba aitsü aser iba province nung meimchir temeden nung aibelenba tembangtsü khanga liasü.

Parnoki nisungtem apuba sülen miimbanga ayuba inyakyim tembangtsü aser samar alirtem bushitsü akhang, koba Balochistan nung mangatettep tulu aliba onük ka lir.

Party yagisa bomb pokloktsüba, süngdong atsüngba aser senzüsempongba nokdangba aitsü aser iba ama inyakba yagi yangji alirtem pei kidang nungi tesem balalai jenshitsü ta ashi.

BNP den tanga opposition yimten yimsüsür temi Imran Khan, Mahrang Baloch aser tanga political prisoners tem chioktsü akhang.

Ano parnokisa Lahore nung Kot Lakhpat Jail nung puoka aliba Bushra Bibi aser tanga political prisoners tema tekeraba nung chioktsü akhang.

Party-isa Pakistan sorkar dang Supreme Court-i Imran Khan asoshi obendang agüja aliba ama inyaksü khanga liasü.

Pakistan Tehreek-e-Insaf (PTI) züngsemtem aser constitutional movement den sendaka aliba lenirtem anema military courts temi ken o benoka aliba opposition lenirtemi magizüker.

BNP-i ano Balochistan Mines and Minerals Act ya magizüker, koba Pakistan

mitkar-i nungiter aser Baloch aser Pashtun tesemtem nung ali rongsen agitettsü atema hadir ka ama amshir ta aitsür.

Parnoki ano Balochistan nung Baloch aser Pashtun region tem nung ozüng alema ali lemsaba indanga aija liasü.

Iba province nung ali, ali rongsen aser tanga rongsentem ketdangsütsü asoshi yimtenren tsütsü mangatettep adoka aliba mapang iba party yagi tai apur.

BNP-i Taftan, Chaman, Badini, Mashkel aser Gwadar ajanga arütsülen shishilempaba akhi ama tekeraba nung kumdaktsütsü takhangba agütsü.

Balochistan tesem aika nung arütsülen shishilempaba ya nüburtem takum alitsü lenmang tongtipang ka lir, talisa Iran aser Afghanistan den arütsü anasa aliba nüburtem asoshi kanga tongtipang lir.

Parnoki Balochistan nung divisions aser districts tasen yanglutsüba aitsü aser iba inyakyim indang sangdong agentsü akhang.

Indonesia nung rong ka meküpok; nisung 129 samar bushidar

Jakarta, Rongjui/

September 14 (Agencies):

Deobarnü Java Sea nung passenger mena aliba rong ka meküpokba sülen Hombarnü coast guard densema Indonesia nunger teküzmükertem noklang aikati nisung 129 samar aliba bushidar. Iba lendong nung nisung trok asübabo jangjaogo.

Virgo Transport 8 rong nung nisung 243 mener Deobarnü tsüngsang kanga majungba ajanga sama liasü, ta rescue agency-i ashi. Ketdangsürtemi ashiba agi, rong koba East Java nung Surabaya nungi South Kalimantan nung Banjarmasin tesemi oa liasü, iba rong nungi nisung 108 bo küzmükogo.

Tzüsemer aser mopung kanga tesashi asüba ajanga Hombarnü teküzmükba

maparen nung tetsükdaktsü adoker, ta national rescue agency tekolakba Mohammad Syafii-i ashi.

Agency yagi teküzmükür 622, rong 17, helicopter aser tayimtsü pongu yoka samar alirtem bushidar, ta Syafii-i ashi. Rongtem karbo lendong ataloker aliba tesem tongaogo, saka meküboker aliba iba rong yagi soketa atutsü atema tetsükdaktsü aika ajangshidar, ta pai ashi.

"Onoki tzü telung nung inyaksangshitsü akokba personnel tem yoktsü, saka tang tzüyim kanga mesüngjemteti aliba ajanga meyokteti arudar," ta paisa shisem.

"Tsüngsang tajungba akümtsü ataba mapang onoki special skill aketba personnel tem tali anidentsü merangdar,"

ta pai ashiba den, asürtem tang tashi nung maneni trok dang lir.

Rescue agency-i lemsatepba video ka nung sentsü temerem aser tanak teper aliba rong tulu ka meküper tzüyim nung tesadang ka angemoka ir aliba nguogo. Iba rong meketa rong tilala ana nisung mener senzüa aliba kasa video ajanga sayuogo.

Rong ya Banjarmasin nung Trisakti rongnendak nungi nautical miles (km 150 shi) 80 shi pilar meküpoka liasü, ta tanga rescue agency kati Reuters dang ashi.

Hombarnü anogo tom tashi nung samar alir nisung 129 rongnung ka danga monguteti lir, ta iba rescue agency nungi Arianto-i ashiba den, tsüngsang kanga majungba ajanga samar alirtem bushitsü mekoki lir.

Chathe Challenge 2026 takok nung tembangogo



Chathe Challenge 2026 Pickleball asayamung tempangba sentong nung Chairman NSMDC, Kuputo Shohe-i jembiba noksa ngur.

Dimapur, Rongjui/September 14 (Agencies): Chathe Challenge 2026 ta nung jaloktsür Pickleball asayamung ka September 12 nü at The Fitness House, Dimapur nung tembangogo. Lokti nem shilem agidaktsütsü, tembar yimteptsü aser sportsmanship tanüla

ajungkettsü nükjidong nung iba asayamung ayongzüka agiogo. Asayamung shibangba sentong nung NSMDC mendenbuba Kuputo Shohe alakteta jaoker liasü, aser sentong ya Kakivi Chishi lenisüba nung agi. Sentong nung o jembiba

mapang Shohe-i, taküm yimya, libaliro, teamwork ajungkettsü aser wadang balala nungi nüburtem longjemdaktsütsü atema saisabong ya koda tongtibang iba indang lemsatep. Paisa, asayartem aser asayamung ayongertem dang state nung pickleball aser tanga asayatem maneni ajungkettsü atema ajungshia liasü.

Iba asayamung ajanga Kohima, Dimapur aser Chumoukedima nungi pickleball asayartem longjemdaktsüogo, aser asayartem toktepettsü aser telungjem akatsü atema sabang tajung ka agütsüogo.

Asayamung ya "Across the Chathe, Together on Court" omen nung ajemdaker asayaogo, aser iba ajanga saisabongi koda lokti balala longjemdaktsür aji sayuogo.

Asayamung shibangba sentong nungsa Dimapur-Chumoukedima team Vice-Captain Lhouvi Punyü aser Kohima team nungi Keviselhou Sekhose nati salem osang lemsatep. Iba sülen asayamung nung takok angurtem nem sempet lemja liasü.

Zverev-i tang mezüngbuba US Open kokogo



Rongjui/September 14, 2026 (Agencies): Deobarnü US Open tebur kija asaya final nung Alexander Zverev-i USA nung asayar Ben Shelton koka tang mezüngbuba iba asayamung kokogo.

German nung asayar yagi tanabuba Grand Slam kokogo. Pai final asaya ya 6-3, 7-6 (2), 5-7, 6-2 agi koka liasü.

Küm aika kanga junga asaya aruaka Grand Slam ka danga mekokteti asaya arur Zverev-i taküm French Open akok aser tang US Open kokogo.

Grand Slam ka nung number one seed ama tang mezüngbuba asayaba mapang Shelton-i asaya jung metenzüktetba maongka agia Zverev-i asaya amokbanger asaya liasü.

Shelton ya 2003 küm Andy Roddick sülen iba asayamung akokba mezüngbuba America nung akümtsü meranga liasü, saka pai Zverev mekokteti asayamung tembangogo.

"Onok küm 30 tashi Grand Slam ka danga mekoki asaya aru aser ita asem tsünga ana tashi koktetogo," ta Zverev-i ashi. Paisa, pa tetsü aser par team dang kanga pelaba lemsatepa liasü.

"Tsüngremi onoki kanga meranga inyakba, timtemba aser tejashi tashibatam ajak ngur asütsü südi. Taoba mapang onoki meranga inyakba 2026 küm jungkai adokogo," ta pai ashi.

Zverev-isa, tetsü pa tanur asüdag diabetes putetba sülen timtem nung aliba mapang teyari agütsüba indang jembia liasü.

"Ni kü asaya kodanga merprangdangba saka kü taküm nung ajak dang tongtibangtiba nisung ka nem tenüngsang agütsüner. Ner jabaso arishi küm pezü asüba mapang diabetes puteta aser asayatsü asoshi tasak asütsü ta meteta akümba mapa ka nung, pai kechi kümner kumdaktsütsü ta ashitsü atema kanga dang tashi tait tetsü ka nungdaker.

"Iba tashidak nem onok mekokdaktsü. Onoki iba tetsükdaktsü ajangetetba aser tang kechi inyaker aji inyaktetba atema ni kanga pelar aser la danga kanga pelar," ta Zverev-i ashi.

Maneni Zverev-i, Shelton tenüng sanga jembiba mapang pai iba asayamung ya künübo akoktsü ta ashi.

Archer Dhiraj Bommadevara-i otsü tasen ka yangluogo



Rongjui/September 14, 2026 (Agencies): 2025 Asian Championships gold medallist Dhiraj Bommadevara-i Deobarnü recurve asaya nung gold medal ka ngua pa India nung tebur asayartem rongnungi World Cup Final nung gold medal ka anguba mezüngbuba asayar kümogo.

Saltillo, Mexico nung final asaya nung pai Japan nung asayar Nakanishi Junya shoot-off ka asayaba sülen koka liasü.

2023 aser 2024 teka tazüng aruba sülen Dhiraj-i quarter-finals aser semi-finals naprongla amokbanger asaya aser final nung world No. 20 Nakanishi 6-5 (28-28, 28-29, 29-28, 28-30, 28-27) agi koka liasü.

Tenaprongla game pongungu akokba sülen shoot-off Dhiraj-i 10-9 agi koka liasü.

Iba asaya akokba sülen Dhiraj ta India nung tebur recurve asayar kati World Cup final nung gold medal anguba mezüngbuba asayar kümogo.

Maneni Dhiraj-i iba medal anguba ya küm 16 sülen India nung asayar kati World Cup nung medal ka anguba

mezüngbuba asütsü. Jayanta Talukdar-i tatesa 2010 küm Edinburgh nung tebur recurve asaya nung bronze medal ka ngur liasü.

India nung rongnungi Dola Banerjee-i dang World Cup Final nung gold medal ngur liasü. Lai 2007 küm Dubai nung asayaba mapang tetsür kija asaya nung gold medal angu.

Dola-i gold anguba sülen India nung asayar kati danga gold medal ngur maliasü.

Ajisüaka India nung asayartem rongnungi Deepika Kumari-i World Cup nung medal timtiba ngur lir. Lai silver pongu aser bronze medal ka ngua lir.

Iba asayamung akokba sülen Dhiraj Japan nung Asian Games asayatsü atema aotsü. Pai anir

India recurve team asayatsü.

Gold medal atema asaya nung Dhiraj anaben tashi tesülen liasü, kechiyong Junya-i asaya kanga junga tenzük. Ajisüaka Dhiraj-i süngjemshir Junya menepa tua 5-5 aküm.

Arrow trok akhaba sülen Junya 3-1 agi tejakdang aküm, saka Dhiraj-i tasembuba set nung point 29 ngua 3-3 aküm, saka Junya-i telangzüba tajung agüja pa 5-3 agi maneni tejakdang aküm. Iba sülen Junya-i asaya akoktsü atema set pongububa ya makokyonga tie dang asütsü nüngdaka liasü. Ajisüaka set pongububa ya Dhiraj-i akok aser shoot-off asayatsüsa aküm koba India nung asayar yagi 10-9 agi akok.

Pakistan team India nung tebur Asian Champions Trophy asayatsü

Rongjui/September 14, 2026 (Agencies): Pakistan tebur hockey team taruba ita Mohali, Punjab nung tebur Asian Champions Trophy asayatsü renema lir, ta Chief Minister Bhagwant Mann-i Hombarnü ashi. India sorkar police ajanga Pakistan team multi-lateral asayamungtem nung India nung asayatsü melar.

Asian Champions Trophy ya October 27 nungi November 5 tashi asayatsü. Asayamung nung asayatsüpur rongnung India, Pakistan, China, Japan, Malaysia aser Korea densema lir, koba Jalandhar aser Mohali nung stadium tem nung asayatsü.

Asayamung nung asayatsüpur kar danga masayatetsüsa kümra melentsü atema Oman aser Bangladesh na reserve ama shimer yua lir. Iba asayamung ya Asian Hockey Federation tawabangba kübok kümshia asayar saka 2025 küm masayai liasü.

India defending champions ama iba asayamung nung asayatsü. India team-i 2023 (Chennai) aser 2024 (Hulunbuir, China) küm iba asayamung kokogo.

"Multi-national asayamungtem atema kecha tebilemtsü mali. Individual series (India aser Pakistan) bo

masayatetsü akok," ta Mann-i ashi. India indang central sports policy ajanga India aser Pakistan na bilateral asayamungtem asayatsü memelar.

Ajisüaka Olympic Charter dak ajemdaker Sports Ministry-i, India aser Pakistan na multilateral asayamungtem nungbo asayatetsü, aser India-i ayongzüka asayamungtem nung Pakistan nung asayartem asayatsü atema tenokdangba magütsütsü, ta

shiogo.

Mann-i ashiba agi, ACT games league-stage ya Jalandhar nung asayatsü aser semi-final o final Mohali Stadium nung asayatsü.

Iba asayamung takok tashi nongita yaritsü tenangzüka agüja Mann-i ashiba agi, iba asayamung ayongzüka asayatsü atema Punjab bendanga agütsür lir, koba state nung iba amala mesükba mezüngbuba asayamung asütsü.

BILEMDANGANG

"Temulung temerük agi taküm ain adokdaktsür."